

八指頭陀詩集

卷七至卷十  
述

第二本

PL  
2771  
.A6  
v.2









2771  
.A6  
v.2  
八指頭陀詩集卷七

題柏公東洲禪室



釋敬安寄禪

柏公愛幽寂於此置繩牀石氣沾書潤藤花染衲香  
野禽嘯落日古樹覆禪房誰避炎蒸苦來尋竹外涼

送文大令緯之官蜀中

家貧親復老捧檄最憐君竟作折腰吏徒爲絕頂文  
楚天涼雨過巫峽夜猿聞掛席自茲去何時話白雲

山居四首

獨鶴高飛倦深林野性宜石膚雲自潤松隙月能窺靜

覺藤花落寒知日影移山居味禪寂興到偶吟詩

道念何由熟幽懷誰與論池魚晨聽梵山鬼夜敲門破  
屋牽蘿補微陽透衲溫客來休問訊妙意了無言

佳樹圓如蓋重巖冷似冰林鴉爭墮食松鼠嚙枯藤水  
月自清宴煙霞絕愛憎卻嫌雲窟裏著箇苦吟僧

靜境無人到禪扉鎮日扃漲痕窺戶白樹色過牆青苔  
繡定中石風吟殿角鈴何須滅聞見物我兩俱冥

朱亭夜泊書懷寄呈王益吾祭酒四首

征帆卸無日日暮此重經松栢逾前翠鬚眉失舊青臨  
流嗟逝水玩道愧飄萍捨筏終吾事何論醉與醒



天地有終極江河日下流泰山甯壓卵夜壑竟藏舟  
易動孤生感難爲大厦謀白鷗吾愛汝身世任沈浮  
不寐翻經帙迢迢過雁聲江楓寒更落漁火滅還明去  
住違初念艱難賦遠行一燈深夜裏默默自含情  
遠嶼含霜淨危藤倚樹牢微雲生漸密孤月出難高苦  
恨入山淺翻令應物勞懶殘當日意悔與鄴侯交

衡陽國清寺感事八韻兼呈朱純卿明府

衡陽古國清過客不勝情共說林泉好其如雀鼠爭嶺  
梅寒欲發徑草殺還生白晝狐狸語荒村虎豹行雲含  
出岫意猿作斷腸聲零落禪枝蔭淒涼梵磬鳴金沙誰

再佈紺宇勢將傾欲乞甘棠樹移陰覆化城

吳中丞壽

甲午

南衡壽嶽峙崔巍絳節油幢記往回滄海一丸觀日出  
青松十萬倚雲栽乘槎舊見蓬瀛淺立馬親從太華來  
欲問和羹他日事春風先報嶺頭梅

三年霜戟照湖湘八座衣冠擁畫梁力挽黃流還禹迹  
功宣紫塞奠堯疆靈椿大壽知難老金粟前身豈易量  
待起華嚴樓閣定與公重獻九霞觴

題沈蘊石蕉葉白石硯

奇哉一片石價抵連城重久毓端溪靈曾補綠天空煙



雲旣氤氲龍蛇亦飛縱不知倉頡前此物將焉用

送吳雁舟編修入都

湘春門外柳忽作淺黃痕念與故人別彌令嘉會敦浮  
雲信難定神理貴能存好以無爲法長扶 有道尊

二月初四新霽與諸道人陪湘綺先生游浩園還

憩張狷叟東寮作

心閒得靜理城市不能喧逍遙暢天和來與法會親憑  
虛縱元覽吹萬亦以勻丹葩耀珍木綠草映芳園潛鱗  
渙清猗鳴禽悅新瞰眷今物始榮感往情彌敦平生白  
社游屢開碧湖尊如何剎那間俯仰迹已陳勝流忻再

集神契諒仍存歡言託毫素聊用譔良辰

花朝日湘綺翁集道俗八人觴於碧湖聽雨賦詩  
居士宣春和置酒碧湖濱招要雜緇素逍遙忘主賓登  
樓坐寒雨眺聽怡心神沈陰亦殊佳山川共緼縕空濛  
天宇閒出沒蒼紫痕草樹沐餘潤生意方忻忻農夫荷  
鋤立顧語煙中人眷茲天游樂念彼春耕勤吾徒竟何  
爲豈不惜良辰夢想衡雲棲歸歟勉日新

豁然居士山莊

真想塵中契幽居物外尋閒門扃竹色靜影息松陰片  
石成高卧孤桐謝賞音惟應碧溪月鑑爾綠蘿心

山居喜譔大立三見過

茅屋依巖曲柴門傍水斜病餘生砌竹坐久落庭花窺  
鉢從饑鼠營巢護乳鴉故人今辱顧聊與論三車

憲齋尙書於南嶽植夾道松三十里感賦

靄靄山上雲曾爲昌黎開青青夾道松今爲尙書栽尙  
書篤高誼愛此後凋姿植之於名山豈曰匪所宜感公  
意良厚苦心善護持旣患牛羊踐還恐藤蘿欺鋤煙理  
荒穢編竹資藩籬敢藐毫末莖合抱知有時不剪柯條  
繁終阻出羣枝矧茲蘊靈境鸞鶴當來儀千秋頌遺德  
何獨甘棠詩



甲午夏余以事羈長沙適學使張子虞編修登祝  
融觀日訪余不值特錄舟中望衡一首留以示意  
因依韻奉和

南薰云解愠炎蒸何鬱鬱徘徊火宅中慼慼意無悅讀  
公冰雪吟煩襟頓以失煙衡置几前靈宇若可卽谷懷  
自沖虛霞想亦峻潔元覽欣已宏神契誰與結伊余慕  
肥遯重巖卜其宅應真逝豈遙微言嗟已絕坐惜芙蓉  
萎常憂天柱折芙蓉天柱皆峯名幸瞻嶽祀全遑知障海溢甘  
受達人嗤永貽來者逸終爲廬阜雲恥作王城乞偶避  
蒼蠅污久與青山別世事若轉丸歲月如飛瞥長謠歸

去來寄入湘靈瑟

挽鄧彌芝先生二首

世相無常住愁聞薤露篇關心一別後彈指十年前曾  
問雲亭字同遊建業船如何方廣約偏乏入山緣  
蕭蕭涼夜雨翦紙爲招魂河北游難續江南道益尊談  
空思舊社捨筏悟真源一片清溪月凄然照墓門

贈謝衡山楨一首

達人蘊宏抱緇素所同欽孤松挺勁節幽蘭馥高岑揚  
鱗躍清池振翼懷好音敬也誠藐劣負荷亦其心元關  
偶失捷浮塵遂來侵湘月寢靈耀衡雲飛遠陰至論析

疑義神光霽初襟秋巒澄晚翠羈禽還故林立功豈望  
報爲德亦已深勒銘於山椒聊用竭微忱

將去南嶽入廬山一首

疇昔袞微尙入山恐不深如何二十載遂負平生心坐  
爲浮名誤乃使客塵侵如衣敗絮衣行於荆棘林求通  
反成礙欲昇彌以沉疾風鼓洪濤萬壑無停音狂流思  
迅濟焉能待來今誓辭衡雲棲遠躡廬山岑遠公雖已  
遙餘芬猶可欽

南臺寺避暑

質簾萬个森禪房田衣不脫心清涼山鳥一聲新睡起



綠陰滿地藤花香

五月二十五日與蕭兵部浩園夜話

疏雨梧桐夜清言契道深浮雲從世態壞衲稱余心欲  
息勞生影惟期寶樹陰他年入廬阜元度莫相尋

贈蕭兵部卽以留別

僧寮每同飯書味與禪清自有千秋業何關一第名寒  
花期晚秀孤月看微明後會知何處煙波萬里情

易鼐生茂才偕友人登祝融峯詩以贈之

峻極祝融頂相逢話少曛霧高常隱日石澗每生雲草  
木堅逾瘦天香靜乃聞如何入靈境尙欲戀人羣

黑沙潭觀瀑

久美黑沙名芒鞋快此行遙看晴雪墜近覺夏寒生不  
動臨淵羨惟餘洗衲情題詩問潭水應證道心清

宿西來禪院

萬樹丹楓色亭亭映夕陽遠山晴更翠寒菊晚猶芳竹  
戶雲侵榻松林鶴語霜禪心愛秋月久坐爲清光

青山庵贈見上人

萬山青不斷一徑入幽篁破衲披雲冷寒花墮砌香繩  
牀容倦卧玉版喜新嘗爲感高禪意殷勤話夕陽

九月二十日與法輪慧朗二上人古佛林晚眺

高步縱遐矚聯吟愜道情孤峯皴夕翠落木墜秋聲  
樹昏鴉急春雲野碓清卻隨樵唱返煙寺月微明

宿古佛林次前韻

邱壑容吾卧煙蘿不世情已忘蕉鹿夢惟聽澗猿聲  
野竹浮煙暗山泉入簞清微雲碧虛淨孤月自圓明

瑞華寶華二上人陪伍司馬入山疊前韻

萬緣久休歇惟有故人情欲作絕交論其如伐木聲  
偶因車笠至留話石泉清不覺碧雲暮松窗夜月明

宴坐有得

蘭若凝禪寂柴門鎮日關定中惟見水身外忽忘山  
神



理雖自悟太虛甯可顏了然清淨義不在語言間

謝衡山解篆還省感賦是詩

兩載名山賴護持離歌未唱意先悲  
他年天柱峯頭石  
惟作羊公墮淚碑

雪中過古佛林五疊前韻

林壑皓以潔超然適我情  
庭鴉微有影巖溜靜無聲  
羣木勢已折孤梅氣益清  
何須然慧炬不夜月常明

歲暮懷陳吏部漢陽六疊前韻

久懷陳吏部歲暮若爲情  
積雪凝寒素孤鐘傳遠聲  
衡雲飛翠冷漢水照人清  
黃鶴樓頭月還應似昔明

過廣濟寺

廣濟宜禪悅幽深罷送迎雲連虞帝廟

安上峯有舜廟相傳舜巡狩駐

蹕於此

山削禹王城

此寺峯巒削翠狀如城郭禹王治水經此故名

古木無樵

採荒溪有鹿行巖僧長避客不問野人名

色空無碍頌

樹枯自回春心空豈滯境靈溪雖湛然不拒花枝影

田靜法師願請龍藏回山賦詩紀勝

并序

甲午冬岐山靜法師駐錫京都恭逢

皇太后六旬慶典奉

旨於萬壽寺祝

嘏蒙

賜藏

經一部

御書福壽墨寶喇嘛所貢無量壽佛

千尊 勅令供奉山中爲民祈福復 賜萬壽  
寺額紫衣鉢具團龍法服以示欽崇明年二月  
恭齋還山冠蓋傾城出送南郊時香花夾路幡  
幢盈空道俗歡迎百里不絕誠勝事也因爲詩  
一首以紀 恩遇

金山一寢耀迷雲障大千哀哉長夜中慧炬誰能然猗  
歟靜法師宿植元根堅挺生於頽流誓欲迴百川念茲  
微言墜憫彼邪見纏乃宏求法願慨焉凌風煙徘徊岐  
路間顧影心自憐持錫入京都乞食恆苦寒精忱召靈  
和神足回迤邐叨逢



佛母誕得預名僧筵蟠桃敢竊獻伊蒲容勝餐 龍藏  
荷寵錫象教崇敷宣青松果東向白馬遂南旋香花夾  
通衢仙梵盈遠天日月揚光彩草木競芳鮮殊勝信罕  
遇妙密固已圓冥照鏡愈顯輟響聲彌傳請爲智者說  
庶用忘言詮

感事一首酬衡陽令朱太史益濬

乙未

我身如浮雲起滅任所之香塗等刀割嗔喜兩俱離惟  
有君親恩欲報嗟無時憂來曷由拒淚積不能揮上念  
宵旰勞下憫征役疲氛埃晦宇宙腥羶混華夷鴟梟  
苟得勢鳳凰無寧棲大鵬在其側歛翅猶徘徊忍見百

烏王坐受微禽欺猗歟朱夫子慨然動深哀忠義夙自  
許肝胆誰爲披敬也亦何人欲令樹藩籬聚塵甯培嶽  
測海真慚蠡感公意良厚中心常依依昨夜松間卧合  
眼神飛馳飛馳過弱水水色湛瑠璣墮爲難陀龍以身  
繞須彌長鯨犯波來吞食靡有遺夜叉服神力稽首遙  
皈依修羅亦恐怖竄入藕孔絲海氛旣已淨天宇方澄  
輝梵唱警禪悟皎月猶懸枝夢想雖非眞殊足慰人思  
持用答嘉藻才鈍幸勿嗤

寄懷明州呂文舟胡魯封二首

并序

光緒丙子余駐錫明州從與了法師呂文舟徐

酡仙胡魯封諸子游以文舟居近東林寺用敝  
遠公故事結社吟唱精進極一時之勝自酡仙  
歿後余歸南嶽忽忽十有一年與公示寂又七  
年矣乙未之夏與公弟子心愷續緣二上人自  
明州數千里訪余湘中歡會須臾旋即話別爲  
言文舟魯封近益衰老思余日甚每遇湘僧問  
訊不置有恐今生不能相見之語乃不禁愴然  
涕下因爲一絕寄文舟一律懷魯封以敘生死  
離別之感蓋亦不自知其言之爲悲也

二十年來故舊疏湘雲海月恨何如遠公已死遺民老



愁絕衡陽一紙書

自從徐孺定交期每惜陳蕃下榻遲配仙晚年常館魯封家課其子女

看竹品泉猶昨日招魂翦紙忽今時存亡異地應同感寂寞空山祇自悲欲續東林蓮社傳西風吹鬢已成絲  
將由南嶽入海述所懷兼呈陳符戴文諸外護

忽忽三年過蕭蕭兩鬢華名山休再往勝地漫相誇易植貪嗔草難萌智慧芽霧高常隱豹澗險每驚蛇久訟巴人芋頻勞長者車忘軀全嶽祀歷劫幾河沙僥倖功能就倉皇念已差拂衣辭洞壑灑淚別煙霞獨鶴誰爲侶孤雲何處家滄浪看濯足碧海擬乘槎回望祝融頂

行吟湘水涯惟攜舊藤杖仍著破袈裟事定情彌怯詩  
成手自叉吾生淡如寄此去莫咨嗟

前詩意有未盡因疊韻爲游仙一首

高吟辭五嶽一葦去中華海月行將拾蓬壺勝可誇蟠  
桃初結實瑤草始抽芽貝闕凌雲日琳宮卧虎蛇真人  
揮羽扇王母走雷車鶴舞三珠樹龍盤七寶沙星辰手  
堪摘凡聖念休差煉藥開丹竈凝神漱碧霞松喬俱得  
道劉阮悔思家徐福曾登嶠張騫遠泛槎冥冥天有界  
渺渺水無涯精衛徒銜石靈鼈不受叉冷風吹梵唄清  
淚溼袈裟恨未聞真諦仙游祇自嗟

登高臺寺有感

客心浩無極日暮此登臺寒樹蟬初歇秋風雁欲迴雲  
開千嶂出湘轉一帆來借問祝融氏誰憐厯劫哀

憶天台

天台四萬八千丈曩者幽尋悵孤往躡屐遙侵積雪前  
捫蘿直踏層雲上石梁誇壑凌紫煙下有千尺之飛泉  
鎚幽鑿險詎人力太古靈構信自然奇哉赤城鬱神麗  
秀色難名豈空翠應眞羽客紛來儀瑤草琪花常不萎  
華頂摩空星斗寒登臨始壯平生觀乾坤俯仰但一氣  
吳耶越耶青漫漫忽而毘嵐吹海立雷火燒空雨聲急



妖藏鬼匿長河懸虎嘯龍吟百靈集須臾淨洗羣峯環  
乃乘白鹿辭名山爾來屢諗草木改風塵行腳凋朱顏  
每念舊游長太息夢痕夜度剡溪碧真人天際坐相邀  
指點神巒是吾宅袈裟猶掛枯藤枝山阿寂寥猿鳥悲  
寒山拾得今尙在歡顏出揖開巖扉落英滿地無人掃  
苦言忘歸惜余老定裏微嫌天樂繁人間那憶仙山好  
何處鳴鐘喚我醒松風還作海濤聲煙霞一覺渺無迹  
迴首東南空復情

浩園夜集次湘綺翁韻呈龍陽方伯遜叟易公

禪棲罷清梵寒夜訪幽人共有名園興來同法會親煙

痕淡可掬梅影瘦如皴居士眞摩詰玄談妙入神  
林鐙然欲燼池鳥寂無聲自契空中賞誰知物外情苦  
吟霜入鬢久坐月窺城心地超諸蘊如何可強名

贈哭庵觀察疊前韻

風雅久寥落沅湘復此人高吟追屈宋痛苦爲君親壯  
志愁將盡童顏忽已皴千篇餘楚些讀罷欲傷神  
微月生寒樹哀笳飛遠聲誰將家國事來繫水雲情莫  
漫填悲海相期憩化城三生圓慧業蓮萼共標名

感懷疊前韻

巖谷思棲隱藤蘿苦絆人且將窮作達轉與道相親落

葉紛難掃寒山翠自皴誰云溷塵俗秋水鑑吾神  
我亦哀時客詩成有哭聲寒暄看世態生死見交情野  
鶴愁將侶閒雲悔入城會須冥物我妙善豈能名

贈白鹿海尊者次見贈原韻

夜吟青嶂月曉漱碧潭煙念子入林趣慚余涉世緣誰  
憐支遁鶴空撫伯牙絃寂寂湘江晚西風爲颯然

臘月八日爲遜叟七旬誕辰素蘓法師招湘綺葵  
園兩先生李藝淵觀察黃芷舫孝廉及余於上林  
寺介壽因作是詩

世尊成道日遜叟誕生辰細雨釀微雪寒城近早春且



餐常住飯休論未來因久惜支公墮

叟自云前身爲支道林

何堪

更轉輪

叟有來生作轉輪王之願故云

八指頭陀詩集卷之七終

八指頭陀詩集卷八

釋敬安寄禪

丙申上巳與宛如葦江照迷淨塵諸開士於迴龍  
精舍禊集

小憩阿蘭若忻逢土已辰流杯遵曲渚躡屐入荒榛蘭  
氣薰衣細桐花照眼新雛鶯初囀樹乳燕欲親人仙梵  
自流響管絃焉用陳芳時難屢得羣彥盡來臻俯仰碧  
虛際徘徊綠水濱古今同一幻世界若微塵聽瀨禪更  
寂觀雲悟益真卻憐王逸少猶是永和春

寄曾公子

一別曾公子名山受累深  
惟修平等行自契妙明心  
眞賞固已在沈吟遂至今  
聊將無著意寄入沒絃琴

吾生

蝸爭蠻觸任紛紛時事於今漸懶聞  
自拭一雙清淨眼笑看孤月出浮雲

寄懷徐十一侍御樹鈞

往者徐侍御逃禪契懶殘  
每勞驄馬至長作白衣看  
極浦春帆遠高樓夜雪寒  
懷君當此際千里夢長安

送周卜芑茂才還長沙卽次寄其舅氏徐侍御原韻



輕敲林下磬客夢恐驚殘秋葉和愁墜離情當醉看溪  
雲侵榻冷山月照人寒五字吟難穩詩魂夜不安

題大瀉密印寺四首

並序

甯城之西百六十里有山界於資水梅山之交  
曰大瀉蓋以瀉水而名焉昔司馬頭陀謂其水  
作優鉢羅華香其上必有勝境乃泝流入山果  
得其奧預記爲千五百人善知識住處後於百  
丈會中見靈佑禪師識爲是山主人適師以錫  
倒淨瓶爲丈所許遂命來居時山谷荒翳篳絕  
人煙拾橡栗充食經六七載無過問者自念居

此爲宏法利生旣斷往還獨善何益卽捨而他  
往旋爲蛇虎所遮留山民知之共營梵刹未幾  
遭毀教之變裹首爲民迨相國裴公休節鎮潭  
州時值宣宗釋禁遂以已輿迎師出山親爲剃  
染廣崇檀度重嚴像設從師咨受心要並捨其  
子出家是爲裴頭陀卽法海也師令汲水供衆  
其姊見而憫之鑿石爲窰以代其勞今寺後有  
美人窰乃其遺蹟師得裴公外護法道大宏嘗  
以水牯牛語示衆林下拈頌傳爲佳話門人得  
法者多仰山禪師其尤著者天下稱爲瀉仰宗

焉師示寂後塔於山南謚大圓禪師塔曰淨惠  
故相鄭愚爲撰塔銘數傳而有真如喆禪師應  
詔入都大闡法要至宋崇甯中寺火而燼潭帥  
曾公孝蘊延廬山空印軾公主法梵行嚴密法  
運重新神宗親灑宸翰賜西甯律師之號洪覺  
範爲撰中興記紀之甚悉明之季世復燬於火  
皇清受命顯揚聖教大宗伯李公大司農周公給諫  
車公太史陶公皆力圖恢復而五峰禪師自四  
明天童來此與養拙明公慧山海公前後住持  
百廢具興法筵稱盛一鎧五燄輝耀至今其時



宏覺國師恭齋 大內所賜金襴僧伽黎衣一襲來鎮山庭雍正十一年 御製瀋仰語錄序加 謚祐禪師曰靈覺大圓乾隆四年道光八年前後 頒賜藏經二部鑾儀護送來山四眾踴躍得未曾有非福地鍾靈孰能致如斯吉祥殊勝也是山四面峰巒峻密如蓮華海藏重重無盡獨毘盧一峰迴出雲表尊如萬乘密印寺適當其麓誠所謂法王都矣余生平所閱名山古剎不可勝紀未有絕巘層巖之上忽廣博巖淨若此者恨昔年山居不久其間巖洞之深邃

水石之清麗未能一一躬踐其勝每一念及又  
未嘗不引領霞外而神往也乙未秋來尸祖席  
禪誦之暇與二三道侶援蘿附葛履險窮幽此  
山真面始豁然於心目而無餘蘊不意余於瀉  
之選勝其因緣遲暮乃爾一日定起撫靈杏梅  
檀之枝對天人送供之石得七律四章以志陵  
谷變遷之感俾後之覽者知名藍法運隆替存  
乎其人必有以道善爲護持不至使琳宮寶刹  
鞠爲蔓草荒煙是則山川之有待於來哲云爾

靈祐禪師古道場象龍蹴踏豈尋常毘盧峰勢凌霄峻

優鉢羅華徧界香此日天人爭送供當時椽栗拾爲糧  
淨瓶踢倒渾閒事贏得瀉宗一法長

唐時宰相裴公美曾捨伽藍佈地金石覓引泉來法乳  
梅檀留蔭護禪林悠悠空翠澄昏曉擾擾浮塵混古今  
欲續真鐙傳佛印幾人能證妙明心

趙宋名臣問法來高僧豎拂講筵開天章宸翰凌雲日

紺宇琳宮闢草萊儘向華嚴窺法界

寺前華嚴坪卽華嚴閣故址相傳昔

有神僧於此放光示現華嚴法界

誰從燒劫辯陳灰可堪明社陵夷日

一炷人天百萬哀

聖代龍興像教新



佛心天子轉祥輪金襴法服來

丹陛寶藏瑤函出

紫宸萬古滄源流不盡千年靈杏樹長春

寺後有祐祖手植杏樹一

株大十餘圍中生梅檀雜木數枝相傳樹之榮枯爲寺中盛衰之徵云

願將微妙伽陀頌

留作生生讚佛因

謁裴公墓

裴公塚對南軒墓祇隔秋雲一片山松徑巖扉俱寂寂  
幾回蘿月悵空還

坐夏偶占

日長無事掩巖扉沈水香清暑氣微一雨綠生穿徑草

萬山青上坐禪衣，卻看野鶴婆娑舞。閒放孤雲自在飛，誰似幽棲林下客。渚煙蘿月淡忘機。

客有問瀉山勝者賦七律二章以答

猿鳥猶嫌館宇喧，此中真趣共誰論。澄潭雲淨龍歸鉢，幽谷風生虎嘯邨。四面奇峰爭入座，一渠流水自當門。客來欲問瀉山勝，手把芙蓉笑不言。

峭石幽泉結四鄰，蓮花佛國淨無塵。長松細草自春夏，野鶴閒雲誰主賓。萬竹綠撐巖下水，千峰寒繞定中身。祇於文字留殘習，爭寫蒼山面目真。

瀉山題大圓禪師影堂

蛇虎曾知夾道留風雷長爲護龍湫濛濛細雨林塘晚  
寂寂寒香桂宇幽赤手開山來百丈白頭皈佛許裴休  
不堪瀉水空憑弔一夜秋聲繞寺樓

裴公菴

裴公菴外水潺潺猶憶辭榮問道還心印早從黃蘗得  
靈棲近在翠微間高風已邈誰能繼明月孤懸意自閒  
俯仰雲煙念今昔杖藜無語對秋山

瀉山水牯牛頌

識得瀉山牯林間任自然身毛亦將白鼻孔也曾穿牧  
笛斜陽裏閒情野水邊一犁微雨足不負祖翁田



夢洞庭作

洞庭滙眾壑雲夢氣能吞吳楚星辰溼風濤日月翻遙  
看青草浪混作碧天痕莫恃重湖濶終須到海門

九月初六日由瀉山越茶洞宿磨刀澗至芙蓉山  
尋仙木嶺憩廣化寺作詩六首以誌幽賞

欲攬芙蓉秀甯辭山路長溪藤牽帽落巖溜濺衣涼寒  
樹墮秋葉幽花吹冷香茅茨隱深谷云是野人莊

忽忽千峯裏行行萬隴巔修篁巧障日渴壁暗欺泉小  
市過微雨孤村生暝煙黃昏山月上照我草堂眠

野碓驚殘夢霜楓醉曉霞遠山分樹色落月映蘆花流

水半灣曲炊煙幾縷斜田家秋穫少得食飼鴈鴉

裂石雲根斷盤空磴道懸筍輿肩屨歇布衲脫仍穿

亦作

危橋臨澗澗孤岫削天圓以前二句景真因並留之

虎跡留苔徑龍湫吼瀑泉平

生好山水遇勝輒流連

煙蘿轉深邃巖岫益崢嶸未雪泉先凍無風松自鳴林棲依板屋生計在巖耕雞犬遙相接蕭閒物外情

幽尋真可樂靈境信難窮丹嶂搖仙木青山捧梵宮果香猿引隊林靜鳥呼風地僻宜禪習吾將老此中

九日芙蓉寺偕若舟省觀二侍者陪宛法師尋熊

居士游青龍峽觀眠雲榻納瀑巖仙人迹三首

小憩芙蓉寺言尋洞壑幽偶隨林下友來作峽中游遠  
嶼寒凝翠飛泉冷噴秋黃花應識我照影向清流

危橋橫谷峻峭壁俛潭陰誰鑿重巖險能寒壯士心古  
藤穿石隙崩岸墜猿吟欲覓仙人迹蒼苔掃更深

水石澄禪寂松蘿絕世姿眠雲呼不起倦鳥欲何之獨  
坐溪邊石閒題洞口詩月明鐘梵近歸路意遲遲

登雲霧山遇方煉士

突兀爭衡嶽蒼茫瞰洞庭雲生天地白山壓楚吳青絕  
壑愁風雨層巒礙日星時逢赤松子談笑破空冥

題遜叟匡廬詩卷

老興復不淺東游尙有詩  
小孤青入袖五老秀橫眉  
聽瀑心彌淨看雲契益奇  
遠公去已久誰與白蓮期

杪秋偕照僧值若侍者陪宛公往香巖巖觀瀑因  
窮瀉源窺石鏡乘月訪楊山人不遇作詩一首

杪秋天氣佳時菊猶芬芳  
悠然動逸興閒雲隨我翔  
重巖削虛翠飛瀑鳴高崗  
綠筱蔽荒澗白日黯無光  
陰森難久留溯溪窮源長  
溪行倏已暝林際下微陽  
攀蘿窺石鏡乘月款松房  
所思不可見露下沾衣裳  
徘徊覓歸徑寒樹煙蒼蒼

大瀉山居次龍陽方伯遜叟垂竿淨影原韻八首



靈源久忘照空翠猶未淨茲意人不知自問寒潭影  
焚香掃竹林幽石苔痕淨久坐衲衣寒松風梳鶴影  
日暮天微陰遠山寒更淨欲雨松先鳴清溪度雲影  
月出山鳥鳴夜禪心愈淨野桂寒有香溪雲澹無影  
侵晨漱寒碧潭水空且淨清機不能言靜對溪花影  
雲中鐘梵寂塵外煙蘿淨一鳥下莓苔啄破松枝影  
湛湛池中水秋來轉明淨皎然一物無祇有青山影  
習定林下居萬緣如洗淨誰能逐狂猿自捉月中影

麓山晚眺疊前韻

日暮蒼翠紫霜楓紅轉淨夕陽如畫工畫出秋山影

清湘白露寒暮色窺人淨紅葉滿天飛疑是秋魂影

瀉山過精一律師故居並題其優鉢羅花室日記

忽忽歲云暮寒蟲鳴我牀住茲曾幾何四山青復黃人生若浮漚鬢髮忽已蒼念昔素心人憩此松下房論道鄙章句撫化證元常豈惟數晨夕亦欲同津梁遠掛南海席共泛東吳航講筵析真義四座聞天香方期昏衢中長瞻慧日光高秋八九月禪枝殞勁霜生死一朝異沈痛結中腸孤雲思無依獨鶴誰與翔甯知泡影謝復覩羅花芳追念平生親墨迹猶數行悲來不能語涕下沾衣裳

長沙重晤崔貞史大令

漆園傲吏後崔侯實繼之  
不折平生腰能展丈夫眉  
榮名焉足寶古道方自持  
奈何白珪質忽作青蠅疵  
罷官歸沅湘恆忍臣朔饑  
著述日宏富力詆邪說非  
胸中浩然氣尙欲塞兩儀  
昔從遠公遊謂上林西公蓮社俱棲遲日

月曾幾何老病乃見欺  
故人無一存高冢俱纍纍

謂當時同

社諸公

念此不能言涕下如縷縻  
歡會苦不久須臾當睽

離黃鵠一冲舉白雲安可期  
願言植松柏各保歲寒姿

山居志喜

林際寒鴉語天涯遠信傳  
故人來下榻斷句補成篇菊

放重陽後梅開小雪前  
雛僧有夙慧解問大乘禪

山居秋興

木落山寒早幽居有所思  
世情雲共薄秋意菊先知  
久病甯妨道多窮豈爲詩  
興來仍杖屨不負野人期

由大瀉之廬山別臨川李梅癡太史

並序

輕舟載雪孤衲生雲山川遠  
適杖錫遐征旣苦天寒彌傷別  
促擲筆三嘆喟焉長懷

江寒天又雪林鳥寂無聲  
念此閒中趣彌傷別後情  
山川已搖落雲水尙孤征  
今夜扁舟月懷人應倍明

臨川太史胞姪仲乾年方十六爲余書錄近作並



次淨影韻詩一首見贈作此奉謝

每訪竹林舊尤憐小阮賢  
從人乞佳紙爲我寫新篇  
對月步淨影焚香契默禪  
終當繼阿叔同作玉堂仙

余將隨哭庵觀察游廬山爲事阻不果感賦並寄  
歸宗修法師

屢欲登廬嶽征帆挂又收  
難酬蓮社約空憶石門游  
健翮思黃鵠閒身愧白鷗  
終當尋惠遠一笑虎溪頭

薄暮瀛仙閣禪坐望麓山殘雪

西峰殘雪在危坐倚空冥  
微雨度高閣孤煙生遠汀  
定回山月白寒入夜燈青  
寂寂一鐘動泠然契獨醒

十二月十六夜銀杏齋與梅癡子坐月

良夜興不淺清言漏已深青天抱圓月照我湛然心  
幽竹淨寒翠疏鐘動隔林微霜引歸步寂寞吐孤吟

故人陳梅根遇於長沙索詩作此贈之

梅根居士余同里四十年來總角交今日相逢人已老  
記騎竹馬到衡茅

過甯鄉縣贈邑宰劉牧村明府

寒城雞犬靜野寺枕雲眠瀟水穿橋下青山拱縣前  
市人多種菜村女半輸棉欲美文翁化松風入管絃

感事二首

寂寂人將老，栖栖歲已淹。  
心空翻得謗，交密轉生嫌。  
蘭蕙經霜殞，藤蘿過雨添。  
甯知造物意，不是考詩嚴。  
此身猶假合，身外復何論。  
那惜浮名損，聊酬宿世冤。  
有情皆是障，無佛便爲尊。  
雙樹今搖落，人天但淚痕。

對雪書懷

四山寒雪裏，半世苦吟中。  
鬚易根根斷，詩難字字工。  
心肝徒自歐，言論有時窮。  
寂寂平生事，蕭然傳夜鐘。

余於丙戌年得鬚易根根斷詩，難字字工二句，至丁酉正月瀉山對雪始足成一律。蓋冥心苦索已十年矣。誦賈閬仙兩句三年得一吟，雙淚流語而

淚爲之流及讀杜詩問法看詩妄觀身向酒慵之  
句覺世諦文字真如廩語因再成一首用紀吾過  
自爲懺悔

十年成一律五字得長城轉念心何苦微吟淚卽傾且  
愁荒道業未必博虛名我法看詩妄能傳不足榮

春山漫興二首

此身於世復何求悵卧春風別有愁碧樹無情鶯自語  
青山不動水長流眼看稚笋淩雲上手種雛松出屋頭  
垂老煙霞筋力倦嬾從大海聚浮漚

地僻離喧雜心閒與道俱輕風吹鶴羽微雨潤花鬚溪



柳自垂戶山泉清入厨繩床纔定起皎月出雲衢

過楊山人居

苔密茅簷淨溪迴石徑斜春風不到處枯樹自生花小  
憩得禪境高吟玩物華林塘清興洽欲去戀煙霞

北湖

北湖煙樹碧氤氳鷗鷺還思舊日羣竹柏迎人猶自翠  
藤蘿得勢便淩雲嬾從冷暖窺時態閒與漁樵話夕曛  
萬古沅湘蘭芷地晚風寒露惜清芬

松林首座曾禮峨嵋九華普陀諸聖蹟最後登五  
臺尋金剛窟文喜禪師見文殊師利問前三三後

三三處

白髮頭陀久放參青山祇在碧溪南此身曾入金剛窟  
會得前三與後三

瀉山與復初西堂話舊

二十餘年別此山片雲無意又飛還故人獨有初師在  
萬壑松杉憶舊顏

懷壺天遯叟二絕

桐花已落棗花香谷口鶯囀又夕陽不見雲中仙輦下  
遙空一髮海山蒼

夢向壺天訪遯翁霜寒鶴背五更鐘醒來依舊蒲團上

萬壽宮詩集卷六  
滿耳溪聲入亂松

送豪素上人歸旗山

三年一彈指相見鬢毛斑歲月亦何速身心殊未閒幽  
情忻共話詩債苦難還明日晨鐘動溪山悵別顏

五月二十七夜夢中重游焦山得五律二章

鐘梵晚蕭蕭淒迷野望遙日含瓜步雨風拒海門潮鷺  
嶺春常在龍宮土不焦江山有如此何用訪松喬

大江流不盡萬古一含情月照金山寺波寒鐵甕城風  
帆隨鳥沒漁火雜星明誰念浮杯客重來白髮生

憶金山寺

遙憶金山寺樓臺倚夕曛浪花翻似雪江柳碧如雲日  
落蘄王廟潮迴郭璞墳何時青筇笠來訪白鷗羣

龔智清上人次兄贈元韻

無影枝頭花正開箇中消息費疑猜維摩不語原非默  
慶喜多聞未是才海底泥牛銜月走巖邊石馬帶雲回  
莫將文字參真諦無縫天衣不假裁

金華菴小憩別補蕉上人二首

遠尋樵子徑小憩化人城細草敷禪榻寒泉入梵聲溪  
霞含夕霽山月吐孤明靜對諸根寂鑪煙一縷生

晨鐘呼客起晴鳥語煙和巖溜初成瀑池蓮乍吐波苔



深游屐少樹雜野雲多愛汝碧山靜何時復此過

七夕夢中偶作

丙申

萬頃煙波一葉行一波未了一波生無端夜宿蘆花岸  
錯認蘆花是月明

湖亭晚眺

丙申夏

蓮葉滿湖風露香望湖亭上望瀟湘暮雲捲盡天如水  
白鳥一雙飛夕陽

八指頭陀詩集卷之八終

八指頭陀詩集卷九

釋敬安寄禪

詠白梅

了與人境絕寒山也自榮孤煙淡將夕微月照還明空  
際若無影香中如有情素心正宜此聊用慰平生

過湯泉少保第奉題十八韻並贈其公子鐵史秀

才

偶別青蓮宇來尋綠野堂萬山凝積翠一雨送微涼鷺  
嶺欺霞峻湯泉沸玉香斷橋橫野水孤笠冷斜陽竹霧  
沾衣碧苔痕映戶蒼粉牆滋薜荔舞罷笙簧風定鑪

八才子詩集卷九  
煙直波澄荷帶長松陰酣鶴夢巖密釀蜂房羽客售琴  
料林僧獻藥方刀瘢恆自匿劒匣每騰光大樹人爭蔭  
幽蘭氣益芳臣心甘隱遯 帝德眷賢良暫息簪纓累  
仍趨鴛鷺行荆吳資鎖鑰江漢重巡防曾忝元戎顧深  
慚淨業荒登龍奇令子愛馬惜支郎白社情相得朱門  
道不妨他時雲窟裏煨芋待君嘗

尋湯泉經冷水井感賦

欲試湯泉水因聞冷井香禪心無去住世態自炎涼轉  
覺詩情淡彌知道味長溪邊值漁父聊與話滄浪

題螺溪寺

微陽下林麓古寺倚巖阿碧澗鳴寒玉青山湧翠螺金  
容俱寂寞寶閣尙嵯峨欲拭殘碑讀淒風動薜蘿

述懷次葦江上人元韻

吾道竟何適老懷難強寬誰能得骨髓祇自歐心肝壤  
衲眠雲冷孤松過雨寒栖栖十年事未得一枝安

重宿護國寺

星移斗轉欲三更玉露無聲夜氣清二十七年重宿此  
碧梧涼月不勝情

夜坐

幽人夜不眠愛此碧虛月涼風一颯然吹動梧桐葉



送胡漱唐太史歸江右

與子初相識那堪又送行  
楚山青不斷湘水碧無情  
待訪石門勝同尋蓮社盟  
匡廬在何許悵望白雲生

六月二十二日哭龔觀察集道俗十六人於浩園  
精舍銷夏

名園開法會勝侶集禪房  
曲沼過微雨碧梧生晚涼  
藤陰移榻影荷氣襲衣香  
一笑諸天暝松寮露佛光

贈別李二翰林瑞清

涼風入庭樹忽覺葉皆秋  
念此歲月晚增余雲海愁  
故人江上棹高柳雨中樓  
相望情何極殘陽下橘洲

秋懷一首寄易由甫

帳卧滄江歲月遒  
神巖回首憶前游  
罡風幾見瑤華折  
明月長懸碧海愁  
天上星移方惜別  
淮南木落又悲秋  
道人別有傷心淚  
石爛松枯灑未休

秋夜哭俞用賓大令

仁者得其壽  
斯人獨不然  
微官初掛籍  
一病竟凋年  
野寺秋雲冷  
空江夜月懸  
平生念知己  
淚灑綠蘿煙

八月朔白霞寺入院作

巖谷卜余宅  
煙霞慰我思  
暗泉依竹細  
寒蕊著花遲  
倚石看雲幻  
穿林念鳥疲  
勞生空復爾  
莫負綠蘿姿

八十五 詩言集卷九  
三  
秋日懷林莊江

湘上西風急颯然涼雨過意中故人遠愁外亂山多一  
葉生秋思重雲阻嘯歌何時數椽屋相與傍煙蘿

山居秋暝

雨過林塘晚猿鳴館宇幽地寒黃菊瘦僧病白雲秋落  
葉下枯樹微陽生暝愁昏鴉亦何事相對語啾啾

大海篇贈俞翰林明震

并序

太史別余八載昨自台嶠新歸感時話舊相對  
淒然

大海何涯涘孤懷寄遠深徒勞精衛力誰見魯連心鯨

浪吹難息鵬搏勢易沈滄桑今昔事回首一沾襟

瀛仙閣晚眺

微雨過汀洲涼波帶葉流眼看孤鳥沒心共片雲留天  
地餘殘照江山非昔游臨風一揮涕不獨爲悲秋

九月十四夜訪高葆吾

幽人喜涼夜聞步信孤筇細雨寒林葉微霜遠寺鐘偶  
聞蘭雪詠聊駐水雲踪惆悵吟歸去千巖冷碧松

徐叔鴻方伯以麓山紫芝詞見寄賦此奉會

萬木氣蕭森孤吟對夕陰寒隨秋雨重愁入亂山深獨  
鶴難求侶昏鴉易擇林聞君紫芝咏動我白雲心



江亭

江亭聊遠眺，暝色鬱蒼蒼。  
孤嶼吐寒翠，萬山爭夕陽。  
旋看秋月朗，空使野雲忙。  
萬古瀟湘水，東流接海長。

江樓夜坐

霜冷葉初丹，江樓獨倚欄。  
暮雲飛鳥倦，秋雨鏜寒林。  
下安禪好，天涯乞食難。  
年年重九菊，不向故園看。

贈高葆吾

挂冠歸故里，閒適有餘清。  
對月常孤酌，看山每獨行。  
喜留禪客飯，懶問達官名。  
一笑緣何事，枯吟鍊句成。

暮秋書懷

渺渺身何往蕭蕭鬢已斑  
亂雲生樹密秋雨閉門閒  
有愛都妨道無心更買山  
祇愁孤笠影乞食到人間

題素蕉小綠天庵圖二首

懷素工書草聖傳素蕉作畫  
欲通禪老僧別有西來意  
祇向東林種白蓮

不羨雲煙筆底生  
讓他書畫並馳名  
惟思掃石蕉陰卧  
靜聽瀟瀟夜雨聲

古詩八首

九月二十八日過芋香山館訪梅癡子適黃子  
耘茂才亦至掃石坐雨慨言時事仰睇浮雲俯

觀刹土得詩七章以示依正無常之感

涼颼激庭柯忽覺山寒早落葉墜閒愁紛紛不可掃念  
我白蓮儔幽居恣元討欣然冒雨來清言契蘭藻黃公  
亦以至相與傾懷抱凡流衆所趨至道誰能造人我每  
固執夢想徒顛倒憫彼芭蕉身生意日枯槁灼灼霜中  
華甯復幾時好

憶昔芋園叟

芋香山館爲輔  
堂中丞故宅

挂冠早還鄉於此抱幽獨

養真善自藏箬書以自娛草木隨青黃冥心探理窟虛  
室朗神光片言折羣論狂瀾爲不揚至今沅湘地蘭芷  
猶芬芳斯人不可作慨焉情內傷

秋雨已成霖晚稻猶未穫茅茨斷炊煙呢饑喧鳥雀盜  
賊恐縱橫王風益蕭索客塵昏擾擾元氣隱凋削升人  
術雖神安能填漏壑苟令邦寶充何辭混沌鑿悵望蒼  
天高浮雲紛漠漠

南嶽有丹鳳孤飛求其羣嗷嗷日流血百鳥如不聞下  
有禿頭烏銜木淩層雲欲以培元棲見拒祝融君大厦  
須羣材區區何足云

昨夢升忉利始信修羅高海水雖至深僅乃齊其腰舉  
手摩須彌日月皆驚跳帝釋亦畏弱欲偕諸天逃忽見  
金剛身持杵乘神颿眾怨悉摧伏長揖辭丹霄功成猶



雨泣轉念天王勞

聖教久淩替邪說亂吾真神珠不自識魚目爭爲珍海  
若揚洪波毘嵐鼓劫塵五洲一腥垢萬古同酸辛哀哉  
閻浮提誰爲覺斯民

我不願成佛亦不樂生天欲爲娑竭龍力能障百川海  
氣坐自息羅刹何敢前髻中牟尼珠普雨粟與棉大衆  
盡溫飽俱登仁壽筵澄清濁水源共誕華池蓮長謝輪  
迴苦永割生死纏吾獨甘沈溺菩提心愈堅何時果此  
誓舉聲涕漣漣

題陳笠唐觀察東山草堂十二詠

東山雲岫

劫火焚大千浩歌淚如瀉悠悠東山雲出岫何爲者

五華聳翠

僊人嚴佛地欲問如來義手把五色華散爲江上翠

鯉林聽禽

鯉林幽且閒綠蘿蓋茅屋山鳥一聲鳴野花紅簇簇

紫嵐夕照

夕照烘晴嵐流光雜蒼紫遙峰數點煙出沒空濛裏

黃崙環帶

青山亦好奇環繞自成帶誰能解之去挂向金山寺

黃鸝春曉

春與清溪深天共白雲曉  
晴鳥語煙開萬山青不掃

桐山卓筆

高山削成筆大海滴爲墨  
欲寫妙明心觀心了無得

戴工野燒

北風夜中起戴工火勢勁  
荆棘一以焚轉愛寒山淨

新林屏玉

美玉蘊石中誰能識其妙  
仙家持作屏林谷生輝耀

團山霜鐘

團山宜宴坐寒巖轉幽獨  
一聲霜外鐘禪心盪空綠

蓮華石嶂

女媧補天時留此片石在怕受仙人鞭逃入蓮華界

西溪琴韻

湛湛西溪水淙淙作琴韻此曲人不知泠然神自運

掃石

掃石白雲邊山空生淨禪幽禽解人意細語綠蘿煙

雙銀杏齋訪梅癡子不遇二絕

有約侵晨至云何已出門誰憐雙杏樹相對了無言  
日暮重來此庭空語亂鴉牽衣問童子猶說未還家  
晚歸鐙下重作



孤雁不堪聞禪棲正憶君空攜筇竹杖兩度出寒雲

書感次龍蔭凡見贈原韻卽送其行

俯仰悲身世興亡念古今可憐滄海事偏繫綠蘿心風  
雪離亭晚關河別思深孤鴻欲何處萬木已寒森

哀時次虬仙眞一子原韻

秋風吹過雁落葉正紛紛大地無全局遙天有片雲時  
危思作將世亂豈論文獨向仙人語凡夫未遣聞

送李梅癡太史入都

戊戌

碧湖楊柳色又送故人行不向花前醉

前約會祠奉饒未到

其如

別後情雲隨金闕迥月傍玉堂明他日承天問休稱

懶衲名

君嘗戲言使我爲懶  
侯當請徵懶殘問道

梅癡子將入都余作送別詩經半月矣臨解纜復  
贈此詩仍次前韻

平日祇言別今朝果送行請看春草色不盡故人情江  
上孤村晚雲間片月明欲持煨芋贈耻近懶殘名

梅癡子乞陳師曾爲白梅寫影屬讚三首

一覺繁華夢惟留澹泊身意中微有雪花外欲無春冷  
入孤禪境清於遺世人卻從煙水際獨自養其真  
而我賞真趣孤芳祇自持澹然於冷處卓爾見高枝能  
使諸塵淨都緣一白奇含情笑松柏但保後凋姿

手豆附言集卷九  
九  
寒雪一以霽浮塵了不生偶從溪上過忽見竹邊明花  
冷方能潔香多不損清誰堪宣淨理應感道人情

送易實甫觀察之江南

春水綠波明春風碧草生梅花香別酒柳色映行旌直  
下洞庭野遙經湓浦城江南煙景好應慰宦游情

效龔定庵體二首

梁居士

坐破千潭水月痕寒灰一寸偶然溫空觀假觀中道觀

待與台宗學者論

君久習天台正觀

楊葵園

念佛三昧世少信惟有無爲子親證

君父仁山先生專修淨業有無爲子

之風樂邦消息近云何爲我蓮臺一問訊

夜雨寄懷張狷叟卽題其湘雨樓畫卷

一夜瀟湘雨高樓應未眠可堪思舊事莫更賦哀蟬

公

悼亡詞數卷

竹栢自蒼勁煙雲從變遷遙憐圖畫裏別有好

林泉

萬山青繞戶中有卧龍盤心以看雲淡詩因聽雨寒入  
辭棲鳳闕穩把釣魚竿何日來相訪清言共倚欄

與湛大月下禪坐有得

故人清夜至掃石坐煙林不有花間月誰知悟後心虛



空猶是妄大海豈云深相對了無說埜猿時一吟

王午樓飯僧有作

右丞高尚士亦有老禪心爲我開香積因君動苦吟花  
枝經雨重草色閉門深齋罷徐歸去春雲野寺陰

題哭奩觀察所藏張夢晉畫軸

吹笙王子已昇仙那得還餘色界緣卻笑張生虛捏怪

祇留姓字畫中傳

傳稱夢晉爲王子晉後身  
以其母夢晉而生故名

曇花一樣夢中身紅粉青衫憶宿因艷說才人甘乞食  
可憐猶是墮情塵

身後身前何足論

君自言爲  
夢晉後身

都緣業識弄精魂多生結

習宜除淨莫認空潭水月痕

紀夢詩一首

井序

二月十四夜夢與曹蔭萱徐孟虎俞壽臣及其  
姪慎修冒雨同至一山飛流界道峭石橫雲迥  
非人境於煙靄中見林表碧桃初花擬攀蘿往  
折忽晨鐘驚醒簷溜猶滴窗全曙矣

仙山不可到而我自何來絕壑雲扶雨晴空瀑吼雷更  
從青嶂出遙見碧桃開忽忽晨鐘動方驚夢裏回

贈尹山人和白卽題其陰符經註後

胸中邱壑一塵無人海茫茫意自孤門巷蕭閒苔蘚碧

入子豆附詩集卷九  
滿庭風雨註陰符

霞外神情誰復知  
蒼蒼鬚鬢已如絲  
春風落魄長沙市  
錯被人呼老畫師

感事呈葉吏部

時事已如此  
神州將陸沈  
甯堪憂國淚  
忽上道人襟  
春色何高下  
浮雲自古今  
與君聊一笑  
各寶妙明心

別陳公孫自述所懷

不用折楊柳  
東風送我行  
離情芳草醉  
春夢落花輕  
未證三乘果  
聊攻五字城  
他時蓮社傳  
恥獨以詩名  
八指頭陀詩集卷之九終

八指頭陀詩集卷十

釋敬安寄禪

題桐院感舊圖

并序

曩余居祝融峯時中丞吳公巡閱過衡偕其幕賓陸廉夫登峯觀日出憩余松寮論道言詩極相歡洽及余歸省廉夫將爲吳公畫南嶽圖邀余就署中問峯巒巖谷之狀甚悉臨別以其所居庭院有梧桐數株枝葉榮茂因作桐院談詩圖相贈且曰僕吳人寓此薺時卽歸師巖穴中人此後非有因緣亦難重來如來見此梧桐則



如見我與延陵公觀雲海於祝融也語畢泣然  
不久吳公秉節出關廉夫亦返吳門自是不通  
聞問已六年於茲矣今春義甯侍郎陳公爲其  
黃夫人資冥福余偕僧衆入署誦經一日公孫  
師曾偕至其室則廉夫故居也時方二月桐葉  
未敷禿立雨中了無生趣對景懷人不勝榮枯  
今昔之感因涕下公孫詢知其故爲余作桐院  
感舊圖屬余爲詩以紀其事

舊院談詩處重來最憶君曾觀滄海日高卧祝融雲風  
雨一爲別死生長不聞空持懶殘芋獨自倚斜曛

寂寂數株桐淒淒立晚風榮枯今昔異吳楚別離同彈  
指六年過觀心萬事空懷人無限意都在雨聲中

夜坐懷王午樓

寂寂夜鐘沈知君正醉吟  
春愁雙鬢改書味一鐙深  
生死誠堪託

熊鶴老身後其子女  
婚嫁皆君一人任之

榮枯共此心還須歸白

社何用鍊黃金

送陶觀察森甲之姑蘇

春波如鏡草萋萋十里垂楊綠映隄  
借取祝融峯上月  
送君直下洞庭西

周鐵園太守前署沅州府解篆已二十餘年戊戌

奉命重典是郡余傷其垂老出守窮邊慨然賦  
贈

一棹沅江去生涯絕可憐不堪黃綬事始授白頭年列  
郡棠陰遍孤懷海月懸誰知憂國淚重灑百蠻天

得沅陵徐大令方泰書并寄鉢餽賦以答謝

祝融峯頂別回首意茫茫絕岫孤雲出名山舊業荒藤  
蘿高蔽日松柏飽經霜遠辱故人問開函淚數行

聞道沅陵縣風煙近五溪荒村山鬼怯深谷怪禽嘯石  
瀨橫流急蠻雲落日低猶勞分鶴俸千里寄招提

四月二十三日與陳師曾兄弟齊集徐筱谷棗香

書屋

蕭然數椽屋不似在城居  
水竹涼生戶籬花香滿裾  
故人成邂逅高論入元虛  
何用參禪悅園蔬味有餘

五月初七日阻雨宿東禪寺

城北東禪寺還因聽雨留  
乍看雲過樹旋見月當樓  
聚草螢光溼披蘿鬼語幽  
吾生機慮盡夢逐白鷗游

東禪寺與達公夜話

定中孤月自常明  
身外浮雲屢變更  
欲捨福田紆國計  
每談淨理厭詩名  
渡杯祇恐魚龍覺  
施食還憐鳥雀爭  
天上人間盡惆悵  
與師惟有證無生



題麓山寺

迢遙鐘梵下斜陽寂寂巖花渡水香  
殿角一鈴風自語  
窗前萬木雨初涼  
山銜雲氣窺人淨  
江挾濤聲入海長  
卻羨巢松千歲鶴不知塵世有滄桑

送郭諤士歸東山別墅次壺天遞叟將之匡廬留別韻

人生適意豈易得  
念子能爲林下游  
莫遣白頭咏團扇  
謂君姬四  
照優婆夷  
安排赤足踏飛流  
哦詩飲酒且自樂  
石爛海

枯焉用愁咫尺溪山是吾宅

君別墅距余白  
霞寺三里許

綠蘿明月

共淹留

贈雷筱秋孝廉仍次前韻

英雄不分邱園老下第翻爲海上游  
玩世幾人餘白眼濯纓何處有清流  
雲歸衡嶽千峯雨日落長沙萬古愁  
莫謂賈生虛痛哭治安一策至今留

還山書懷疊前韻二首

客塵擾擾無甯日南北東西已倦遊  
卻抱白雲還絕巘忍看滄海作橫流  
蛟龍吐霧方爲虐鷗鳥驚波亦自愁  
幸有荒園一叢竹清陰猶爲道人留

覺皇邈矣余生晚不見應真靈鷲游  
佛海深深誰悟入世波汨汨競分流  
雲中挂錫非無樹澤畔行吟別有愁

回首中原堪涕淚青山一髮夕陽留

再疊前韻奉寄壺天遯叟廬山

憂時鬱鬱壺天叟乃託神仙汗漫游手挽銀河成瀑布  
心懸朗月照寒流小姑江上如含笑五老雲中爲解愁  
他日扶筇訪高隱虎溪應有畫圖留

唐人有虎溪三嘯圖

秋夜偶得

萬念已俱澄深宵獨倚藤道心寒皎月書味淡秋鐙山  
雨時數點溪雲忽幾層思量明日事飯雜芋頭蒸

七月二十夜大雷雨和乩仙作

冥冥天宇中風雨挾雷吼袈裟換酒回仙人能飲否

附北仙原作

雨昏人欲靜何處蒲牢吼借問定中身尙著一塵否  
與曼衍道人話碧湖舊事戲贈

箬笠棕鞋興有餘憐君結束在官居何如碧浪湖邊去  
名士相逢話鯽魚

昔君開碧湖詩社王雁峯院長以詩  
譏之云長沙近事君知否碧浪湖邊

多鯽  
魚

紀事

懶貓伸腳睡初酣饑鼠偷油上佛龕夜半雨聲穿枕過  
此身如在綠蘿菴

綠蘿菴  
在南嶽

病中憶徐小谷陳師曾



風火爲災聚苦因支離銷瘦病中身五更鐘梵殘鐙裏  
一息微微念故人

病中喜尹和白謔立三陳梅根雷筱秋王愷琴饒  
十三左臺生聶襄才彭星階諸君子前後見過感  
賦一詩

一牀方丈萬緣疏落木涼生山雨初最是故人交誼重  
秋風肯顧病僧廬

哭剃度本師一首

摩挲定石有餘溫不覺三衣濕淚痕棒喝無人規誡絕  
此心孤寂向誰論

先師東翁夜過洞庭偶得句云不知何處仙人笛  
吹落梅花滿洞庭誠仙籟也又山居有山大白雲  
遮不住長留面目與人看之句皆見道語惜俱未  
成章病中無事爲足成二絕句以志先師道德文  
彩於一微塵中耳

湖面君山一點青黃陵月上睡初醒不知何處仙人笛  
吹落梅花滿洞庭

天涯無事覓心安世界微塵定裏寬山大白雲遮不住  
長留面目與人看

題柏松如廣文爲陸少尉白冤事實後十六韻

陸機本廉吏盜跖爾何愚乃挾百咎怨因加二卵誣風  
雷森國律星火下州符黑獄安能白青霞亦受污親朋  
空掩泣患難孰相扶慷慨如君者甯非義士乎逢人都  
說項爲友竟忘軀且效包胥哭休令杜伯誅覆盆冤果  
雪任俠世應無大府奇其事諸生式所廬鄭虔猶薄宦  
阮藉尙窮途天道高難問琴歌晚自娛盤飧甘苜蓿庭  
宇任荒蕪妙譽馳江左英風扇海隅龍門爭作傳鳳德  
實堪謨欲識凌寒節孤松與衆殊

野寺

野寺衣青嶂高亭俯碧湘風濤翻夕岸木葉下微霜新

月初成照浮雲忽掩光憂時無寸補慚愧事空王

重哭本師

一病成終古三生未忍論空餘馴鳥迹猶在淨苔痕欲  
哭還同俗忘情恐負恩西方如可往

先師偈云西方吾所願昨夢白蓮花

長願奉晨昏

徐又穆明府自沅陵還湘枉駕問疾賦詩奉贈卽  
送其赴清泉新任

林端動棲鳥谷口報鳴騶舊雨成良會名山憶昔游吟  
髭應更白病骨已經秋語罷浮雲事西風起別愁

遙指清泉縣人喧地自閒白憐分岸水青愛隔城山君



好種桃去吾曾乞食還他時或相訪拄杖叩花關

明妃怨感友人作

明君甯好色玉貌敢承恩不怨畫工誤休將妾意論塞  
雲悽斷雁關月冷歸魂青塚春來草萋萋向玉門

棄婦吟

棄置復何道徘徊祇自憐郎心無定好妾貌若爲妍難  
使秋風熱空悲團扇捐蘼蕪何處采長跪故夫前

爲淨業上人題白梅

絕壑無尋處高寒是我家苦吟終見骨冷抱尙嫌花白  
業宜薰習清芬底用誇卻憐林處士祇解詠橫斜

書胡志學守戎牛莊戰事後五絕句

并序

胡君志學從左文襄積功至守備乙未牛莊之役胡君負營主尸力殺數賊中礮折足遂擒羈海城六月和議成始還至上海西人續以木足戊戌秋晤余長沙出木足及身上槍痕以示爲之泣下感爲五絕句

折足將軍勇且豪牛莊一戰陣雲高前軍已報元戎死猶自單刀越賊濠

海城六月久羈留誰解南冠客思憂夜半啾啾聞鬼語一天霜月曬骷髏

八  
北  
東  
詩  
集  
卷  
十  
一  
紙官書到海濱  
國仇未報恥休兵  
回看部卒今何在  
滿目新墳是舊營

收拾殘旗入漢關  
陰風吹雪滿松山路  
逢野老牽衣泣  
不見長城匹馬還

彈鋏歸來舊業空  
祇留茅屋惹秋風  
淒涼莫問軍中事  
身滿槍痕無戰功

從軍曲三首

十三從軍便守邊  
五千鐵騎常相連  
長城一戰陣亡盡  
我心何望圖凌煙

手把殘旗招夕陽  
英魂隨余還故鄉  
髑髏忽起作人語

爲我附書與耶娘

耶娘在家兒遠戍生死不得知其故兒今已與新鬼鄰  
兒婦休爲故夫誤

前征婦怨

妾在故鄉君遠戍兩地相思無處訴君還故鄉妾出關  
夢中那得曾相遇

夢中不遇復何傷念君新婚別故鄉別時十四今四十  
欲寄寒衣知短長

後征婦怨

夫戍邊關妾在家側身西望空黃沙相思不見情何極



願逐春風入塞笳

塞笳忽作嗚咽嗚聲聲是妾斷腸聲斷腸之聲無別念  
願君早得還鄉縣

遜叟於九江建琴心樓落成說二偈奉寄

琴志琴心共一心

實甫觀簪先於廬山建琴志樓

心心相印一張琴此

琴若鼓人天泣鍾子甯能是賞音

琴志琴心父子樓平生各自有千秋一拳不打斯樓碎  
風月無邊事未休

憶明州皈依長老

太白峯前聽法回寒梅二十度花開何時七堦橋邊寺

重禮明州布袋來

寄水月法師

憶昔天台訪赤城與師芒屨踏雲行何堪一返衡山錫  
草木蒼黃十四更

古詩一首呈曾公子咏周

種松南山中枝幹初成陰方期鸞鶴儔共保歲寒心  
鴟忽眈眈藤蘿亦森森坐使幽蘭花遷香於別林羣疑  
久乃釋真賞仍在襟長荷君子德孤根託高岑

悼可忠和尚二首

衡雲一別後相見總無期詎料揚州去長留湘水悲浮

生雖大夢度世亦明師寂寞殘秋菊還如病鶴姿  
卻到安禪室徘徊悽舊情鑪煙如入定經案似平生欲  
問雲歸處空看月自明因思真寂樂轉覺幻緣輕

題盛壽巖明經遊峨嵋詩集

之子抱幽興峨嵋踏翠行三峯何突兀五嶽失崢嶸天  
向巖邊沒山從足底生神巒長不夜自有佛燈明  
不惜千金盡因求一覽奇深山雲作屋古木石爲皮淚  
下啼猿峽心清洗象池佳遊應不負贏得有新詩  
云著謝公屐曾遊金頂邊陰巖常積雪夏衲總裝棉掛  
壁銀河曲懸空鐵棧連何當策藤杖親禮願王筵

我聞銀色界常放白毫光澗曲窺蛇浴峯高礙鳥翔五  
更先見日六月尙飛霜迴與人境別真爲聖道場

贈沈子粹叟十六韻卽題其一角園詩集兼以留  
別

沈子餐霞人清風自絕塵心閒能卻老詩好不妨貧妙  
悟區中要幽通靜裏神錦江曾濯足湘渚獨垂綸乃得  
山川勝而存竹柏真苦吟聊避俗高蹈復誰倫莫作郊  
居賦須扶大雅輪往叨青眼顧重與白眉親著論慙僧  
肇安禪賴許詢戒珠虛朗潤法味益酸辛龍象休云力  
鴟鴞詎可馴迷津疲濟渡覺路莽荆榛割切雖無礙行



八掛山詩集卷十  
藏或有因打包思入蜀振錫擬游秦欲斷知交愛其如  
涕淚頻浮雲一爲別相見定何晨

奉題俞廩軒中丞卧遊圖六首次原韻

衡山本是鄴侯鄉煨芋親嘗箇味長七十二峯青似昔  
請公不用憶錢塘

橘洲寒樹得春溫水淨沙明絕點痕樂歲亭前饒逸趣  
新詩傳誦到山門

一雨郊原草木柔田夫含笑入城游使君福澤真殊勝  
淺水今行自在舟

莫向君王乞鑑湖青天一月不妨孤好將夜雪瀟湘景

寫作山陰訪戴圖

鏡水稽山記昔過亦曾應供學阿羅月明湘上聞漁唱  
猶似湖濱發棹歌

十年行腳理歸裝揀得松枝掛鉢囊今日因公動游興  
青山依舊夢中忙

棗香居士新婚索詩

寶閣夜流光仙梧集鳳皇偶攜綠蘿月來醉紫霞觴法  
喜成嘉會陀羅吐妙香維摩與天女相見也無妨

戊戌十二月初七夜夢登天姥最高處占此寤而

錄之

八才詩集卷十  
絕頂建招提登臨四望低巖雲時作雨山漲自成溪空  
翠晴猶濕靈禽靜不啼何當息行杖於此卜幽棲

予夢登天姥之七夕忽夢登祝融

忽到祝融頂青天手可捫雲霞飛寶蓋日月浴金盆異  
采紛難狀羣峯各自尊仙風吹夢失欲覓了無痕

晤沈炯甫談亡友曹悟生遺事感賦

往者曹悟生依君如弟兄每逢老僧話深感故人情竟  
以窮愁死空留寂寞名相看憶疇昔不覺涕縱橫

紀事十八韻

蜃氣樓臺新更新驚濤滾滾浩無垠關邪孰起孟夫子

亂世胡生魯聞人豈有忠忱憂社稷但憑游說作經綸  
燒天欲縱焚書火折檻誰爲請劔臣御史青驄皆避路  
郎官粉署復何論思莼張翰求爲友抗疏匡衡恥與鄰  
密樹陰林巢黨羽敢從賢路植荆榛

去騰虬仙詩云新舊相爭黨禍作荆

榛滿地海氛惡蓋預知有今日之變也

弄權竟使朝綱紊變法徒傷風俗

淪將見明時成暗夜可堪白足混紅塵琳宮梵刹資王

化

明宋濂云深山大澤無琳宮梵刹必爲虎狼盜賊之藪而二氏亦有資於王化矣

敗種蕉芽

斷善因未必文章成棄物休嗟像教絕傳薪鳳毛麟角

誰能賤貝葉曇花世所珍皎月暫藏圓照影浮雲詎損

太虛真冤禽枉自填滄海熱血旋看化碧燐

某甲謂某乙曰吾輩



此後當以熱血相見及甲伏誅乙  
往視血猶未冷其言竟成讖矣

忍背 君恩沈鬼窟

幸承 帝力轉祥輪  
涸鱗再躍昆池水  
枯樹重回柰苑

春鑄錯寧收九州鐵  
懷柔終使四夷賓  
願垂佛日光輝

大長頌 堯天雨露勻

前次山陰中丞卧遊圖韻絕句六首意有未盡復

成二律續之

東風吹我夢昨夜過錢塘  
海月窺人碧天星墮袂黃  
鑑湖春水漲禹穴野梅香  
自恨禪那淺前塵尙未忘

浙東山水好最好是山陰  
念我意難釋知公情更深  
其如丹鳳詔未了白雲心  
讀罷詩中畫焚香和苦吟

莊秉恆索題未能齋詩遲遲未報因說此偈

居士築齋名未能題詩索我雲中僧遲遲未報有深意  
請勿以此生嫌憎吾宗所貴在默證毘耶杜口乃上乘  
埽除語言文字障靜觀水月禪心澄世間萬事如泡影  
但寶妙明眞性恆

梅癡子爲豁然道人寫梅錄余白梅詩五首於其上  
因有餘紙復作此詩

人間春似海寂寞愛山家孤嶼淡相倚高枝寒更花  
本來無色相何處著橫斜不識東風意尋春路轉差

送西岸禪人歸萬福庵

己亥

打包應未慣忽憶舊茅庵杖錫遙歸去風光絕好貪幽  
巖雲蓄翠春澗水拖藍於此安心坐禪宗要細參

劉牧村明府出宰安仁贈詩八韻

安仁非大邑豈足屈賢能田少難徵稅峯寒早結冰巫  
歌山鬼笑儒服野人憎市小多藏樹塘荒半種菱春風  
香藥杵落日曬魚簪地僻民情樸官閒道味增論文聊  
課士攬勝好攜僧他日天元頂相期倚古藤

再題山陰中丞卧游圖仍次前韻

浙江多是水爲鄉雪浪如山接海長幾度乘潮弄明月  
棹歌催夢落錢塘

行腳曾無一度溫袈裟猶帶海潮痕回思習定天台頂  
夜雪漫山虎吼門

江城如畫櫓聲柔雲水蒼茫憶昔游夜泊嚴灘聽猿嘯  
萬山飛翠上行舟

打漿曾過賀監湖浪花雲影一僧孤別來十五年中事  
重見山陰好畫圖

恩波重許洞庭過檠戟門閒雀可羅棠樹陰成春雨足  
夕陽亭館鳥爭歌

萬卷牙籤手自裝五湖烟景入詩囊白雲本是無心物  
只爲人間作雨忙



對梅懷陳考功

西江初解凍東閣又敷榮  
花伴枯禪發根從死地生  
風霜憐往劫天地惜孤清  
悞入何郎咏無言淚暗傾

對梅有悟

林園澄夕霽靜對穆余襟  
自寫清溪影如聞白雪吟  
三冬無煖氣一悟見春心  
寂寂欲誰語微雲淡遠岑

送按察使蔡公罷官歸里

長沙遷謫地屈賈尙含冤  
雲鶴自高舉雞蟲何足論  
揚帆經汨渚歸棹向章門  
祇恐君恩重難容老故園  
八指頭陀詩集卷之十終

咸豐元年辛亥

余俗姓黃氏名讀山出家後本師賜名曰敬安字寄禪  
近迺自號八指頭陀先世爲山谷老人裔孫宋時山江  
西遷茶陵明末由茶陵遷湘潭之石潭世業農父諱宣  
杏母胡氏嘗禱白衣大士夢蘭而生余時咸豐辛亥十  
二月初三日也數歲時好聞仙佛事常終日喃喃若有  
所吟誦七歲失母諸姊皆已嫁父或他適則預以余及  
弟寄食鄰家日昃不返卽嘯號蹤迹之里人爲之惻然  
年十一始就塾師授論語未終篇父又沒零丁孤苦極  
厥慘傷弟以幼依族父余無所得食迺爲農家牧牛猶  
帶書讀一日與羣兒避雨村中聞讀唐詩至少孤爲客

早句潛然淚下塾師周雲帆先生駭問其由以父沒不能讀書對師甚憐之曰子爲我執炊爨洒掃暇則教子讀可乎卽下拜師喜甚每語人曰此子耐苦讀後必有所樹立余老不及見耳無何師以病沒然余遵師遺訓不欲廢業聞某豪家欲覓一童伴兒讀卽欣然往就至則使供驅役自讀輒遭訶叱因悲歎以爲屈身原爲讀書計旣違所願豈可爲區區衣食爲人奴乎卽辭去學藝鞭撻尤甚絕而復甦者數次一日見籬間白桃花忽爲風雨摧敗不覺失聲大哭因慨然動出塵想遂投湘陰法華寺出家禮東林長老爲師時同治七年余方成

童也是冬詣南嶽祝聖寺從賢楷律師受具首參恆志  
和尚於岐山專司苦行諸職暇則隨大眾坐禪越五年  
頗有省時精一首座爲維那閒以詩自娛余諷之曰出  
家人不究本分上事乃有閒工夫學世諦文字耶渠笑  
曰汝髫齡精進他日成佛未可量至文字般若三昧恐  
今生未能證得後省舅氏至巴陵登岳陽樓友人分韻  
賦詩余獨澄神趺坐下視湖光一碧萬頃忽得洞庭波  
送一僧來句歸述於郭菊蓀先生謂有神助且曰子於  
詩殆有宿根遂力勸爲學授唐詩三百篇一目成誦後  
精師見余所作大奇之然以讀書少用力尤苦或一字



未愜如負重累至忘寢食有一詩至數年始成者念生死事切時以禪定爲正業一日靜坐參父母未生前語冥然入定內忘身心外遺世界坐一日如彈指頃粹聞溪聲有悟嗣後徧遊吳越凡海市秋潮見未曾有過巖谷幽邃輒獻詠其中饑渴時飲泉和柏葉下之喜以楞嚴圓覺雜莊騷以謔人曰爲狂嘗冒雪登天台華頂峯雲海盪胸振衣長嘯睡虎驚立咆哮攫前以慈心視之虎威亦解又曾於深山遇一巨蟒御風行頭大如斗舌電尺餘因念佛亦無怖旋養疴皋亭山中中夜聞剝啄聲甚急啟闔月明如晝四顧無人如是者數次次夕伺

叩門聲急開戶見一黑團亂躍余與羣犬窮追抵山腰  
厲聲曰我是箇窮和尚不擾汝汝何惱我我豈汝怖病  
尋瘡住四明最久窺天童雪竇窮攬霞嶼月湖之勝郡  
中呂文舟徐酤仙胡魯封馬文齋沈問梅諸君相與唱  
酬余口吃字拙嘗作詩寄李炳甫茂才有花下一壺酒  
句書至壺字忘其點畫遂畫一酒壺於上酤仙書法名  
一時出紙強余爲書筆畫錯落左右易位如倒薤然每  
燕會酤仙以懸之中堂諸客觀者無不絕倒也余平日  
於文字障深禪定力淺然好善嫉惡觸境而生嘗渡曹  
娥江謁孝女廟叩頭流血同行者曰柰何以大比並而

禮女鬼余曰汝不聞波羅提木叉孝順父母諸佛聖人  
皆從孝始吾觀此女與佛身等禮拜亦何過焉甲申法  
夷犯臺灣官軍屢爲開花礮所挫電報至甯波余方卧  
病延慶寺心火內焚唇舌焦爛三晝夜不眠思禦礮法  
不得出見敵人欲以徒手奮擊死之爲友人所阻因萌  
歸志太守宗公源翰驢之是秋八月返權長沙余年三  
十有四計行腳已閱十霜矣越明年省先塋宿莽縱橫  
不可復識望窮山慟哭幸村老有存者指示方能記憶  
蓋自兒時葬先君來此倏忽二十餘年罔極恩深生不  
能奉甘旨死不能導神識不孝之愆真百身莫贖也自

是常往來湘衡閒有所作輒就諸名宿正其得失友人  
陳君伯嚴羅君順循憫余吟詠日久爲之芟定自癸酉  
始迄戊子得古今體詩若干首付之手民嗟嗟余自爲  
如來弟子不能導衆生離火宅復不能窮參究徹法源  
底迺墮文字自拘恥孰甚焉因將平生幻迹學詩緣由  
言於卷末以示余學道無成卽以此自爲懺悔令大覺  
海中增一浮漚可也敬安述

八指頭陀詩集述終













